

太極真人說二十四門戒經

爾時

元始天尊 先天地生 布炁十方 成就萬象 人天之主 河嶽之君  
 日月因之以運行 四時稟之以成像 作修道梯航 為生死津梁  
 出有入無 應時方便 隨緣設教 濟度蒼生 為作法身 周遍天下  
 成一切智 起無邊心 或作帝王身 或作宰官身 或作郎吏身  
 或作出家身 或作法師身 或作龍王身 或作男子身 或作女人身  
 或作乞士身 或作下賤身 種種形變 隨順世間 肉眼凡夫 不  
 能見我 以不識故 多生顛倒 是非人我 貪癡因隨愛欲生 從執  
 著起 便生地獄 結成冤家 從生至生 從劫至劫 不曾覺悟正念  
 身心未入定源 起離虛假 沈淪惡道 漂浪愛河 被業風吹 豈  
 能正定 三業自種 十惡心生 於正法中 盡作分別 永沈苦海  
 解脫無緣 常念眾生苦惱無量 我今傳戒 止惡防愆 能自依行  
 是成道果

太極真人又曰 我前五百生中 發念修道 見一切法 無非真  
 法 何以故 不以假見故 知一切法 無有非真 何以故 以真知

太極真人說二十四門戒經

清微藏書閣

故 故知假者見假 真者見真 但作真心 即是真智 真不離假  
 變假還真 假不離真 妄真成假 但能斷假歸真 戒成如說奉行  
 晝夜讀誦 自無地獄 皆證天堂 凡念戒時 每月一日 八日 十  
 四日 十五日 十八日 二十三日 二十四日 二十八日 二十九  
 日 三十日 月小卻取二十七日 此名十直齋日 立春日 春分日  
 立夏日 夏至日 立秋日 秋分日 立冬日 冬至日 此名八節  
 齋日 正月十五日 七月十五日 十月十五日 此名三元齋日 正  
 月一日 四月一日 七月一日 十月一日 此名四始齋日 正月七  
 日 七月七日 十月五日 此名三會齋日 如此等日 同業共行  
 修道戒人 或多或少 同居靜室 清齋讚唱 念誠燒香 或在觀中  
 名為福地 掃洒房院 即是玄壇 能屈法師 誦我妙誠 燒眾妙  
 香 是時即有左右官使者 三十二天真仙帝君 十方靈官 五嶽將  
 吏 九州社令 山林孟長 水府靈祇 十二溪女 飛天神王 諸天  
 童子 無鞅數眾 一時同會念誡之所 錄其功德 記發心人 當必  
 為之削除罪業 若能堅固抄寫受持 每能念之 劫劫生生 不墮地  
 獄 真人說諸戒偈 我今眾等 深心慚愧 各各受持 唯願戒師

時時為說

第一誡者 不得殺生 割斷他命 煎煮美味 以饒一身 或自

殺 教他殺 見殺隨喜 噉食眾生 犯者過去 受鑊湯地獄罪

第二誡者 不得偷盜 取非義財 夜入人家 晝窺園圃 承其

便勢 遂起賊心 或自偷 教人偷 見偷隨喜 犯者過去 受刀山

劍樹地獄罪

第三誡者 不得心懷陰謀 枉陷良善 見人勝己 便欲害他

計較不平 自求饒益 他好我認 我惡怨他 犯者過去 受爐炭地

獄罪

第四誡者 不得口是心非 鬥亂親戚 談說三寶 讒謗出家

走作唇舌 非笑良善 誹謗聖教 疑惑兩心 說語不平 勸生分別

犯者過去 受鐵犁耕舌地獄罪

第五誡者 不得違經慢道 欺誘他人 敗壞靈壇 侵損常住

隱沒功德 踐踏福地 犯者過去 受剉確剉身地獄罪

第六誡者 不得飲酒 醉亂心神 凶橫無度 不存禮樂 喧悖

尊親 叫喚神靈 驚心損氣 犯者過去 受毒蛇食心地獄罪

### 太極真人說二十四門戒經

清微藏書閣

第七誡者 不得妄言綺語 惡口兩舌 罵詈尊親 毀辱師長

善言惡對 轉為怨讎 犯者過去 受鎔銅灌口地獄罪

第八誡者 不得行邪心曲 耽淫愛色 執著生迷 離他恩愛

奪人寵念 隔絕他家 犯者過去 受抱銅柱地獄罪

第九誡者 不得慳貪吝惜財物 自求饒益 忌妒他人 咒詛一

切 更相猜忌 彼此怨深 犯者過去 受鐵輪地獄罪

第十誡者 不得破齋破戒 不孝不仁 偷竊齋食 隱沒廚供

令彼功德使不周圓 犯者過去 受運石培山地獄罪

第十一誡者 不得毀拆尊像 偷竊幡花 自將供養 充衣裳臥

具 犯者過去 受外鐵床地獄罪

第十二誡者 不得見功德破壞 屋舍傾崩 不好修營 心懷虛

過 犯者過去 受劍林割切身心地獄罪

第十三誡者 不得因到人家 見他有物 便即貸借 方便不還

羅織貧窮 非理逼奪 犯者過去 受寒冰地獄罪

第十四誡者 不得見人有憂心生歡喜 見人苦惱心即快他 見

人有財常思下脫 見人好心常自憎嫌 犯者過去 受鐵釘釘身 身

生猛火地獄罪

第十五誡者 不得不洗手漱口 直進道場 侵觸經像 穢污靈

文 心不恭敬 多生懶慢 犯者過去 受鐵杖亂考地獄罪

第十六誡者 不得探巢破卵 傷胎墮子 非理枉橫 截斷生路

犯者過去 受大石壓身地獄罪

第十七誡者 不得裸形露體於天地日月星辰之下 三明六昧之

中 犯者過去 受鐵錐刺身地獄罪

第十八誡者 不得耗蠹常住 攀摘花果 損折園林 穢污觀舍

不生慚愧 是輕福地 犯者過去 受吞鐵丸地獄罪

第十九誡者 不得雜食葷辛 蔥蒜韭薤 身中臭穢 神靈不居

念誦修持 觸犯靈聖 犯者過去 受吞火食炭地獄罪

第二十誡者 不得自以為是 非笑他家 於諸法中橫起人我

執心自著 不見正真 犯者過去 受磔磨確擣地獄罪

第二十一誡者 不得將諸毒藥方便施人 損他性命 每結怨嫌

犯者過去 受百毒惡汁 灌煮身心地獄罪

第二十二誡者 不得計筭三寶 離隔六親 不念捨施 唯求自

### 太極真人說二十四門戒經

清微藏書閣

饒 言作兩心 不行一信 犯者過去 受拔舌地獄罪

第二十三誡者 不得將齋食就葷辛酒肉相和共食 不敬齋法

諸天罰人 犯者過去 受鐵鎖鎖身 不得託生地獄罪

第二十四誡者 不得自倚豪強 欺誘貧賤 離拆男女 不信天

真 生兩見心 不斷人我 自行非去 不識罪因 犯者過去 受鋸

解身心地獄罪

太極真人又曰 此二十四門誡者 身之大患 犯者鋒刀萬劫

常考生魂 凡人或遍身楚痛 或身自青赤 心懷憂愁 此是生魂冥

司將考 當須各隨力分 燒香入齋 行道禮懺 持心受誡 念無上

天尊 布施然燈 廣造功德 更無再犯 其罪必除

真人又曰 凡欲學道 先須齋戒 洗心防患 持戒功德多於微

塵 微塵之數 見而可量 齋戒之功 無窮無盡 一人持戒 九祖

生天 合家蒙恩 臨難分解 縱盡家產已將布施 還須持此戒經

若學道不持此戒 終各不成就 能持此戒者 即有諸天帝王 天真

大聖 神仙玉女 無極世界一切靈司 燒香然燈 證持戒者得福無

量 剋成道真 諸天香花因便迎接 必將此輩隨願往生 若善男子

善女人聞此戒經 心生歡喜 惡業便除 能捨慳貪 將清淨財贖  
所傳經戒 發起回向 持心精勤 若為亡人臨送之家 或經初七  
乃至終七 持誦此戒 即得魂飛淨境 託生天堂 懷妊婦人聞此戒  
經 臨難分解 若為己身厄難 消除苦緣 闔家得福無量 戒約煩  
惱 隔絕魔心 努力勤修 早求解脫 諸天同唱 而說偈言  
一切修學人 誓願成真道 慈悲念誠文 隨聲斷煩惱  
永離生死苦 得成無上道 歸心向正真 紅顏不衰老

太極真人說二十四門戒經竟

天運壬辰年酉月正一天師清微弟子洪鼎堅羅大英恭錄彙編

鞠昕延複校

太極真人說二十四門戒經

清微藏書閣

太極真人說二十四門戒經

清微藏書閣

太極真人說二十四門戒經

清微藏書閣